



La citât africane di Djenné, fondade tal otâf secul. Dentre anje la moschee di tiere plui grande dal mont. A man drete, i partecipants ae zornade di studi tignude de Universitât furlane.

UNIVERSITÂT. Une zornade di studi par une campagne di sgjâfs te antighe citât di Djenné

Archeologje: colaborazion Friul-Mali

Contribûf, traviers campagnis di sgjâfs archeologjics, ae cognossince e conservazion di Djenné, in Mali, une tra lis citâts plui antighis de Afriche occidentâl, dal 1988 patrimoni de umanitât Unesco: al è l'obietif des campagnis di sgjâfs archeologjics che su la lôr fatibilitât a discutin la Universitât di Udin cu la Sorintendence ai bens archeologjics de citât di Djenné, la Societât furlane di archeologjie e il Cevi - Centri di volontariât internazionâl, intal ambit dal program Unesco "Wheap - World heritage earthen architecture", dreçât al miorament dal stât di conservazion e de amministrazion dai sîts architetonicis di tiere intal mont, che la Universitât di Udin e fâs part dal 2009.

Fondade intal VIII secul e diventade impuartante centri comerciâl pal trafic dal aur traviers il Sahara, Djenné e je caraterizade des abitazions tipichis di pantan e pe plui grande e spettacolâr moschee di tiere. «L'obietif di un eventûal intervent in cheste region - al sclârîs Mauro Bertagnin, docent di architeture tecniche dal ateneu di Udin e conseîr scientific Wheap - e je la protezion di une region uniche tal mont intal so gjenar, vuê menaçade de espansion insediative».

Di chest si è fevelât a Udin, dilunc dal incuintri cul sorintendent



il sindic di Djenné, Yamoussâ Fané e Bamoyé Traouré, il diretôr de

Societât furlane di archeologjie, Massimo Lavarone e, pe Universitât di Udin, Mauro Bertagnin, Daniele Morandi Bonacossi, diretôr de mission archeologjiche in Sirie, e Frederick Mario Fales, storic dal vicin orient antic. La zornade di studi, la che e je vignude sù «la disponibilitât - al anunzie Bonacossi - de bande de sorintendence Locâl a concedi une eventûal licence di sgjâf», e je stade buine «a individuâ - al riferîs Bertagnin - lis pussibilitâts di cooperazion tra lis diviersis istituzions cjapadis dentri e lis pussibil viis par cjatâ i fonts necessaris».